



袁文榮公文集序

我



世宗肅皇帝始定大禮和寧天

鄉意文學之士奉璋被廟崇筆

承輦而稱禁近臣者蓋廩廩庶

幾賡歌揖讓之風焉而公車司

馬門鱗集待詔不能悉當

上指則徃徃窺緣他徑資屑吻以入於

是柄臣左右之名薦士者

天子時自以手書度次取舍稍抑奪其權而我師少傅袁文榮公重矣公初以明經上春官籍第一既及第守翰林二十年而

天子知公名日深延入侍帷幄晉叅大政皆不卜不謀憫然恨得公晚雖公亦自謂千載一遇也故平生著

作於代言應制為多

上數有所徵問夜分出片紙禁中使中貴人刻燭受公對對成以屬其傍侍史封題記歲月而已迺其出入風議纒纒數千百言自

天子左右蘭臺石室外閱戒不傳者豈少哉公沒後且數歲而厥嗣中書君葆佩手澤蒐採廢遺得

什一二於四方好事者刻之嗟  
乎此亦禁鼎一鑿嘗者可以知  
味已而錫爵間頗聞世儒之論欲  
以軋茁骹骹微文怒罵闖然入  
班揚阮謝之室故高者至不可句  
而下乃如蟲飛蟀鳴方嘒嘒鳴  
世以謂文字至有臺閣體而始  
衰嘗試令之述典誥銘鼎彝則

如野夫閨婦強衣冠揖讓五色  
無主蓋學士家溺其職久矣自錫  
爵游公門下公所為文章皆肆  
意衝口對客立說古辭古事如鬼  
神輸運以供佐使而華富溫密  
卒澤於仁義炳如也身不出長安  
門螭頭餘泚所在成霖故無叻類  
鳴悲之態非三代兩漢之書不觀

非爾雅方聞之士不接非咸夏韶  
鈞之音不聽故無棘塞詭衆之詞  
夫天球綴璐陳列廣庭大劍高冠  
班侍左右然後知魚目之無光面  
牆之至困也公壬戌策士有云古  
之帝王建鴻德者必有鴻筆之  
臣褒頌紀載鴻德乃彰蓋若以  
自謂云時錫爵忝為公高第第  
子服義未深而公已升為列星  
故於中書君之請序書以志感  
非敢曰知文也

萬曆元年冬十二月

賜進士及第奉直大夫右春坊右  
諭德兼翰林院侍讀充

實錄副總裁

經筵講官門生王錫爵頓首拜書

表文榮公文集目錄

卷之一

目錄

卷之二

嘉靖壬戌會試錄序

嘉靖乙卯鄉試錄序

擬基命紀序 并贊

擬符瑞紀序 并贊

擬龍飛紀序 并贊

卷之三



贈大中丞東毅孫公入佐中臺序

送會溪扈君陞南京太僕少卿序

送章東備僉憲江右序

送永康王九岳之任曲靖節推序

贈郡守槐溪孫公陞湖廣憲副序

賀及齋魏公陞山東憲副序

贈邑父母少山曹侯入覲序

賀嚴翹守後峯楊公膺薦獎序

送韓旋峯令興化序

送沈春莊令新安序

贈袁慕泉純伯任鹽井叅軍序

送余東川同知蒲州序

送桂世德任聊城薄序

贈邑博省齋符君陞伊陽學諭序

送友人何羅泉之任南昌郡博序

### 卷之四

東園小隱序

紫誥雙榮序

封給事中西園王翁八十序

賀大理卿兩溪葛公九十壽序

敘壽蘇迂齋六表

壽樂隱李翁七表序

賀文林郎霍公太孺人八表序

賀全母宋太孺人八表序

壽貞節秦母王氏孺人七十序

賀少山曹侯榮獎序

賀次臯丘公旌獎序

送雲江錢侯入主秋曹序

送張舜泉使閩道歸澄江序

送奉川紀侯入覲序

贈壽光邑侯郭聚菴入覲序

送鴻臚丞黃石川之番都序

卷之五

贈施南渚令吉水序

送陳懷椿還雲川序

軒亭圖序

護堦蘭茁序

五雲春壽圖序

壽大京兆毅庵孫公八表序



壽南山吳封君九十序

賀靜窓錢公八十序

賀閭侍御母王太孺人壽序

贈郭景復使江右道閩壽母序

壽宗叔南江公五十序

壽錢孺人六十序

壽吳母倪太孺人八十序

葉西隱泊孺人同壽七袞序

壽錢母孺人六袞序

月溪錢翁偕褚夫人雙壽序

徐氏家乘文章考序

賀邑博壽泉徐君膺薦序

送懷葛向公之任蘇州郡博序

蒙亨集序

### 卷之六

進士題名記

重修盧溝河堤記

寶翰樓記

寧國府重修儒學記

休寧縣重修儒學記

永平府重修清節廟碑記

少保南渠李公生祠記

覽輝樓記

吳江沈翁仰高記

句容縣建京兆行府碑記

葛氏祠堂碑記

桂氏復先祠碑記

姚氏弘本堂記

慈谿縣記

卷之七

瑞穀頌并序

禾祥頌并序

王芝頌并序

白鹿頌并序

甘露頌并序

賀聖節表

賀萬壽表

賀冬至表

又賀冬至表

謝入閣表

賀南服奏捷表

賀嘉禾祥表

賀皇極殿成表

賀甘露表

賀瑞雪表

謝入直表

謝陞禮部尚書兼太子少保學士表

辭正二品俸表

謝賜大紅孔雀紵絲衣一襲表

卷之八

端居公事實

封太孺人董母張氏行狀

明故兵部尚書龍山戴公行狀

贈光祿大夫柱國少傅兼太子太傅禮部

尚書武英殿大學士李公墓誌銘

明故兵部右侍郎兼都察院右僉都御史

誥贈右都御史槐川魏公墓誌銘

明故通議大夫都察院左副都御史贈右

都御史李公墓誌銘

明故贈文林郎監察御史樂山胡公合葬

墓誌銘

明故處士陳君宗敬墓誌銘

明故陶配張孺人墓誌銘

明故贈徵仕郎中書舍人勉齋錢公配封

太孺人馮氏合葬墓誌銘

明故周孺人墓誌銘

明故中憲大夫廣東按察司副使濱陽袁

公墓誌銘

明故慈谿訓導張南山墓誌銘

承直郎湖州府通判楚東湯君傳

表文榮公文集卷之二

○嘉靖壬戌會試錄序

恭惟我

皇上至神極聖應運紹天御大紫之器握中黃  
之符峻德豐功登邁三五四十一年以來  
昭翼心於

上帝通馨治於神明周察吏政洞燭民隱令發  
而化馳如霆心懷而威動萬里肆今百司  
循法群黎樂生方內稱救寧矣然

皇上以吏治或至於奸而含生之物未盡浸潤

於澤致治保民之圖

宸慮猶惓惓焉今歲壬戌爲群吏述職之期又當會試天下士

上既命銓曹慎評庶位旌別其淑慝茲復命臣徃典試事畀以網羅俊英之寄

聖意所嚮指視疇曩益加重矣竊念章句賤流蒙恩超擢置諸密勿即百其身無以仰荷君父生成之德今者幸承任使忻忭獨深竊謂可以藉手圖効涓埃之報乃以是月辛酉同諸執事詣闕辭

皇上念臣直贊微勞特頒金緋珍膳馳

賜棘院天恩優異前此所未有也臣感激非常之遇敢不矢志思奮秉公竭忠務得真材以少裨聖化耶顧伏思之銓曹之課吏在於黜不肖而拔士之役在於進賢二者事異而機同相須以成安民之治功也今觀其所黜者或黷貨而貪或峻法而刻或越度而縱或弱植而靡是皆已業厥官計其三載之政行昭晰而易見者也至臣之所進則抱藝握鉛槧之士如玉之在璞瑕

瑜未呈欲以三日之文而槩其人亦難矣  
臣率諸同事者殫精凝思披卷品隲至窮  
日夜之力雖諸士之文雜然竝陳于前而  
純疵媿惡自章明較著粲然而不能掩臣  
取而錄之言若人人殊類皆抉微抒蘊標  
粹揆竒各以其素所蓄者發之文有莊嚴  
瑩徹其詞峻以潔者曰是能剖析義理士  
之廉而不劇者也有溫存爾雅其詞和以  
平者曰是能涵養德性士之豈弟而不苛  
者也有詞之慎密典則從容於法度之中  
者是必履正奉公之士知其不淪於緩也  
有詞之雄深閎肆發舒其剛大之氣者是  
必任重致遠之士知其不流于靡也夫文  
者德之華也言者心之聲也緣華以稽其  
德因聲以溯其心錄其先資之言而獻之  
于

上自此而敷對 大廷陳布有位諸士因言以  
成其信內之亮工熙載外之展案錯事又  
安黎元贊鴻化以副

當宁致治保民之懷則今日之進庶可追他日

之黜矣臣又聞之一年之計樹穀十年之計樹木百年之計樹人夫良農之樹穀必擇嘉種焉以裕嚮神粒民之資也若莠稗稂莠則芟夷蘊崇之矣場師之樹木必掄美材焉以需清廟明堂之用也若荆榛棘棘則剪伐攘剔之矣我

祖宗豐芑之仁

皇上菁莪棫樸之化長養培植以樹多士既深且久乃今錄於有司若嘉種之升豆登美材之中繩墨也誠能懷感國恩爭自磨濯策鉅偉之績建駿奕之功以養萬民以植邦國爲宗廟樹億萬禩靈長之計則多士厚於自樹而臣亦慶於得人庶可以對揚恩命之萬一矣其或行弗逮言文不適用始以賢進而終以不肖黜是自捐其嘉而斲其所以爲美也庸不負

國家樹人之盛心哉

○嘉靖乙卯順天府鄉試錄後序

嘉靖三十有四年乙卯秋八月順天府鄉試士府臣以校文

請

上命臣某臣某往典之祇役錄其士若文以

獻臣某職當有言臣竊惟賢才之生其性資所稟殖繫於地宜而其長懋表樹以効用于世則

上之化機實培之若激勸感興相與砥磨以建勛節則存乎賢才之嚮往顧地宜異齊所固有純駁至化機則融之矣道化普物所入有淺深至嚮往則壹之矣臣嘗覽古傳記中稱燕趙幽冀之間其地深厚踔遠代

產音俊沈毅忼慨喜功名之士乃今被

命掄材獲觀人士之所爲文則見其陳說性命究極理道其詞若渾金璞玉光彩不炫而徐察其精英所涵類擘敷彪著莫可掩遏至論述治體條列時宜語及兵機民隱之失得則又憤然怫悵忠義奕宣似欲以身嬰之而利害所勿恤焉臣閱既作而嘆曰傳記中所稱其信然哉是真音俊沈毅忼慨喜功名之士也士負如此材固屹然社稷之隸乃今濟濟焉生



聖人之朝則地產之良視筐錫珍貢厥輕重較  
然章著矣不足以需

明時之用耶臣又思之今燕趙幽冀之地爲  
畿服士生於其間諸所漸浸稟仰迥殊方內  
乃茲瓌偉卓蹠豈地宜獨使然哉恭惟

皇上握符御曆緯武經文三十四載以來  
德備君師

道隆述作化機所運霆舉颺發海宇從欲於變  
絕絕乎懿鑠百王遠矣士之業鉛槧游黌  
校者即䟽逖阻深猶閭澤

神化得耀乎光明矧

轂下章縫士厥衣被尤渥乎夫仁義所濡沃  
禮樂所淑陶固有股肱輔弼之彥忠信行  
道以翊贊

帝謨若

神武威靈所變化則必有忠勇不二心之臣出  
膺封疆之寄爲

國家樹蕃屏平險阻以靖不恭爾多士既  
培毓有年而操挾軼異茲非他日所宅才地  
耶

聖天子受命穆清德浸裨海率俾之化罔有內  
外顧屬者葢夷匪茹上厯

宸慮寤寐疇咨思得竒俊沈毅之賢委以綏攘  
大計爾多士抱超逸之具邁會

熙明繼自今登雋將奉

大對擢

制科服休采於周行寧不思扶義倣儻不令已  
失時立功名於天下哉且夫晞炎景者不  
隱迹赴洪響者必急節躡

昌隆之運者不後事而昧幾奮義建功達人

所驚以不朽也藉合多士隕生平所許可  
持空文調當世用徒欲希取一時光寵莖  
董焉私便其圖則多士將躬耻之而主司  
亦有滋懼矣故臣於其始進也稽地宜本  
聖化勵其嚮往之志以相成云

○擬基命紀序

自昔帝王啓宇纘圖光宅函夏曷嘗不本  
諸天命哉然總之大端有三曰開創曰混  
一曰中興是皆天命之所睠屬明德之所  
承藉天人相與若響應契合不爽也詩不

云乎明明在下赫赫在上又云基命宥密  
豈不彰彰然較著哉何者天之於人國也  
將挺生帝王乘入緯出符之運建輝奕登  
閔之業以經緯乾坤昭垂萬葉則必有濬  
哲淵懿之君豐樹崇植發祥流慶以基之  
於其先唐虞以上夏哉邈乎靡得而述已  
裔是則周之德爲極隆而天命祚之亦獨  
純渥蓋后稷封郃公劉居幽靜民戢衆至  
古公得玉瑞而其業始大有周開創之命  
肇基於此再傳而文王生有聖瑞受名曰  
昌古公嘗曰我世當有興者其在昌乎迺  
天立厥配而聖女大妣以德相儷由是篤  
生武王代商而集大統有周混一之命文  
王寔始基之故曰允文文王克開厥後我  
明躋躡百代方駕成周自

德祖以暨

淳祖四世蒔德皇源浚遠雖后稷公劉古公積  
累以凝命莫或軒輕焉我

太祖

成祖席龐庥奮景炎擘劃兩儀廓清六幕而迺

其深培長發以基厥命匪

四祖重熙世濟之所貽哉夫天生神聖操開創  
混一之弘權者所以保大定功膺駿命於  
有截擅中興之顯號者所以昭光振耀延  
億萬載丕緒於無疆我

皇上龍翔嗣服赫聲濯靈

中興之治遑蹤首出然本本元元寔惟我

睿宗獻皇帝積嘉祚以待期儲鴻施於

真人美而彰盛而傳視周之文謨武烈丕丕乎  
其一揆也

帝爲

純皇仲子生有聖質

純皇心獨竒愛之既冠擇配而

章聖皇太后嗣徽妣氏作之好逮已而

敬皇首分茅土

興都是宅焉昔周業將昌天錫文名以炳示

明業方興天胙國號以預定中興之讖兆應

信誠于玄默而徵驗察見於顯融此豈人

力所致然哉臣嘗紬金匱玉版之記載得

於學士大夫之所稱及遺民父老之傳誦

而

帝之政行話言巍乎煥乎準天地輝日月以基我

皇上再闢混淪綿亘宇宙之命者不可以仰窺其概耶昔文之王化始於周南而暨於江漢

帝之王德則始於江漢而愾乎天下

帝歷

敬皇

毅皇二朝藩屏南國者二十有餘年宣昭王度

如玉如金推究厥施即履

至尊御

神器總一方軌暢沂埏絃神化橫被於無際舉而措之裕如矣夫敬

天翼心也

帝以歲旱祈霖躬責五事民饑修省飭諭諸臣慄慄乎欽若之念焉法

祖宏軌也

帝讀五倫書有萬世不易之論觀

祖訓手書以爲國寶壹疊乎成憲之鑒焉勤學

鉅美也

帝雅耽書史寒暑不廢研究諸經時有論說古帝王之聖修何以加諸崇儒盛節也

帝謁

先師講周易捐發帑銀葺新黌宇古帝王之右文未或先之重農子民治之善經也

帝繪幽風之什詠稼穡之艱賑窮而蠲稅恤繫以弛刑其湛恩濺澤可挹焉崇儉黜嗜治之軼矩也

帝服再澣之衣減常祿之數拒珍玩之售却玉錦之獻其敦朴履素可則焉當是時朝宁尊之

宗藩式之蒸黎謂謳之其與文王咸和怙冒父母孔邇稱之詩若書者異世而同轍矣夫人心愛戴則

上帝眷歆光前啓後之命爰集

帝躬而

章聖埒淑闕睢茂隆內德以爲之助於是河伯授符慶雲効靈誕育我

皇上稟儀象之元精苞三五之淳曜步斗握鏡

紹撫錄圖制作通神明禮樂藻萬物燿然  
中興萬古爲烈蓋幹關機而獨運規

皇極以大摹即武王之垂拱永清宣王之厲精  
復古比茲編矣彼炎運載昌枝分南頓金  
行重作源出東莞烏可髣髴其萬一耶夫  
五岳凌於天表乃崑崙委其脉四海決於  
地心實星宿衍其流何者積之既遠則融  
結必竒滄之既弘則溥涵必巨其理勢則  
然也大哉

二聖之基命其孰能企之哉其孰能企之哉臣

故哀其始末於首篇畧以拾遺補藝貽之  
來者俾有所攷云

○擬符瑞紀序

易曰河出圖洛出書聖人則之傳曰國家  
將興必有禎祥符瑞所從來尚矣何則天  
之生聖人也含靈獨秀體睿窮幾將使之  
基駿命續洪業緝熙創述以無競震耀今  
古而特隆若此者氣鍾精粹迹挺瑰琦豈  
無超絕殊尤之神物以昭示其麻徵哉臣  
嘗覽觀春秋緯斗樞玉版諸記其載三五

帝王稟命而首出及凝命而時乘莫不有  
昌符上瑞顯兆赫靈渾渾乎嗎嗎乎藻繪  
丹青輝映琬琰未暇遑悉論著已其在有  
周文王之受天命也赤雀銜丹書止于戶  
鳳鳥銜珪降于岐武王之會天命也白魚  
入舟赤鳥流于王屋夫周歷十四王厥邦  
舊矣天將大命文武造區集統聿新姬籙  
故特呈闕象炳先機羽翔鱗躍以焜熿眷  
祐覺寤黎烝蓋周之符瑞視徃初寔倂盛  
焉漢祖開創炎基時則神母夜號芒雲晝  
黶而光武之中興乃有濟陽赤光如麟如  
鳳春陵佳氣鬱鬱葱葱雖未能與周室比  
稱然天心所以啓迪二帝徵應神武者不  
亦駭傳爲卓詭事哉我

明

二祖肇運紹天闡繹當是時天符地瑞磊砢氤  
氲紀諸金繩玉檢者懿哉鑠矣逮我

獻皇建邦篤祐

皇上繼序膺圖天以中興之命昭授不世出之  
玉乃降之寶符珍瑞鴻鴻杲杲洩二儀有待之



奇聞萬古無前之秘不有以揚徽

二祖媿文武而邁高光耶夫烏稱陽鳥武得之  
而王周又孝應也聖人慈孝動天地則至  
獻皇性純慕

親天欲昇

聖嗣以彰孝德故之國有祥鳥集焉紅光燭天  
白水起真人矣而河清雲慶聖人當間數  
而生則竝見

皇上稟日精範月準與天地肖也故誕毓而三  
兆臻焉聖人德至太清則祥風翔甘露降

皇上仁孝以隆本昭格

上帝感通神明故風伯天乳颯然灑然而薦祉  
焉聖人德至太寧則玉石粲金沙湧

皇上誠信以慎終貫徹金石滌漉淵泉故山祇  
川宰若輸若拱而効職焉聖人德至萬靈  
則朱草曄華白兔賁彩

皇上至德淪浹動植各得其所故三秀之瓊英  
千齡之瑤質疊產而層出焉彼唐宋諸君  
符瑞軼有然多獲自殊方來從下邑非有  
崇鉅闕麗之觀猶且君臣動色左右相趨

侈然形諸詩詞標諸竹素以詡張其令美  
矧茲興都爲

獻皇君臨之地

皇上震夙之區衡嶽委其和江漢匯其潤

神聖繼作天人暢訢符瑞之蕃滋真足以照宇  
宙而凌百代豈可無鴻筆之臣列伸玄妙  
紫府之編揚厲芳馨以弘垂於無極哉臣  
故叙興都符瑞之大者述其事于左方云

○擬龍飛紀序

臣聞帝王握靈圖紹大統時乘六龍首出

庶物未有不受命於天也然有命之常者  
有命之非常者其造位同而得天異焉記  
有之曰大人世及以爲禮夫父子相傳曰  
世此則恒軌彛轍易遵也分定理順易繼  
也雖天之所置非有駭觀眩聽之奇亦命  
之常焉爾至若兄弟相傳則謂之及是乃  
玄樞幹妙挺至人以定傾寶契剖符授大  
聖而開泰其事殊特其業昭登寔天非常  
之命純祐獨注曠千載而希觀者也昔在  
帝嚳堯非元嗣也天將隆協和時雍之化

以振高辛之祚故替摯而興堯其在子周  
季歷古公季子也天將恢太和永清之治  
以綿蒼姬之籙故牖泰伯之衷而讓季歷  
焉夫帝莫大于陶唐王莫盛于成周其受  
命也皆不以父子傳而以兄弟禪豈非卓  
跡邁倫赫赫乎軼異哉我

皇上鍾

七葉濬發之祥襲

二聖淵積之慶象緯降精江漢浴質乃赤光炳  
其瑞卿雲德水表其禎

神龍應期而出焉正德末造屬天運百六之交  
值赤劉四七之會有常之命將妙顯於非  
常而代詔向往之機固已潛移而默宰於  
是

皇上順承

帝睠翔自南邦入纘

祖宗之丕緒滌蕩乾坤汛掃荒蕪第茂著

中興之烈巍乎煥乎成功亘清寧文章麗辰  
曜視放勳之則天若相揖讓而王季其勤  
以佑啓文武者不亦矍乎其後耶今夫

壇昂聳駕雲翼風躡昊蒼凌溱澹薄日月  
伏光景轆轤變化騰百川而雨天下龍之  
為神昭昭矣

皇上總攬絃紀載闢渾淪出天入神馳皇驟帝  
操縱卷舒而莫窺其際生殺予奪而靡執  
其端此何以異哉三代以下若文帝感蒼  
龍之徵由代邸而嗣高皇允恭玄默利澤  
施于四海為漢太宗宣帝協柳起石立之  
毳自陽武而繼孝昭慈仁節儉比隆殷周  
之德稱為中宗彼二君者揆其出潜在躍

奮飛九五之迹雖髣髴

皇上之一二然

皇上鴻德駿功震耀軒越檀先後帝王之宗兼  
古今創述之盛即使炎燧復生羲軒再作  
亦且無以尚之矣而况於叔季之君哉臣  
謹哀輯我

皇上受命踐祚之始迄于改元以著

中興之造端云

○擬基命紀贊

贊曰易稱先天而天弗違後天而奉天時

豈不信然哉臣仰窺我

獻皇之積德凝命

皇上受命而中興聖神繼照丕顯丕承鏡宇宙  
以常新洽裨海而無極則夫肇先天之統  
恢後天之烈者儻非此之謂耶臣嘗稽象  
緯閱圖籙歷覽元命諸書乃知天生

獻皇擁庥含曜謹度訃謨得聖人之順

皇上會昌期纘鴻緒揚暉熙號得聖人之時何  
則炎炎

明祚

二祖締之

列宗緝之

敬皇洽之正德間治稍稍更矣

獻皇體天子之德作藩于南樹深播醇洋洋乎  
浸荆襄溢海宇即未君臨兆民然已為

上帝所保佑天下所嚮往乃維垣維城維宗社  
是莫記曰有君民之大德有事君之小心  
獻皇以之可不謂順乎夫天心有待則聖人履  
順以俟時天命既臨則聖人乘時而御曆  
我

明當

毅皇初數符五百祥降七精由是

皇上應運而出振古中興幹二極以清寧滌三  
辰而晶瑩蓋赫如炳如覲耿光於

列聖鑠純懿於

獻皇矣書曰維辟奉天又曰元后作民父母

皇上有焉不可以觀時乎夫先天弗違之謂順  
後天奉天之謂時順則性與天合而佑啓  
咸正時則道與天通而繼述盡神蓋臣幸  
侍

皇上於禁密矣竊覩

淵謀睿政豐業駿功所以君百王臣列辟者揆  
諸

獻皇保艾興都澍濡江漢之治較若畫一故今  
天下翔舞

皇上如天之仁而繹思

獻皇開天之德殆將萬世不磨霄壤俱流彼允  
文執競之功卜世逾歷之祚何可並稱哉

○擬符瑞紀贊

贊曰臣聞帝王有至德於天下有大功於

萬物則天地貺施景象表著乃有元符神  
寶震越輝鎧以昭德鏡功揚弘庥于無斁  
臣今觀

興都所產見及伏讀

皇上紀瑞欽

天碑頌豈不亶然足徵信哉蓋我

獻皇秉純明徽懿之德順承天慶南邦是王

宗室範其度蒸庶沃其仁穆穆乎至德深遠

矣

皇上席宥密之基受

天命而中興丕宣景光載闡鴻烈濯蒙翳以湛  
清豁端倪而軒皎含戴曠熙跂蠕蕃息自  
厥初以來帝王之功莫大焉夫

聖德躡三五

神功幹樞軸則天文靈出地祇瑞呈

興都之竒禎異祉豈非

帝穹所眷錫川嶽所輸効以彰

神聖必然之應哉臣又伏思之德積而彌昌則  
造化之發祥彌熾功崇而益久則符瑞之  
顯祐益滋

皇上接千歲之統四字郡縣六合全盛乃茲協  
氣湟流天人和同極矣毛宗羽族之珍卉  
挺枝翹之秀克圖物牒視

與都所稱列尤浩穰焉昔帝堯在位時則十  
瑞畢臻芻化為禾鳳凰止庭神龍見沼曆  
草生階宮禽五色鳥化白神禾生萑莆生  
厨景星耀天甘露降地管夷吾曰王者封  
禪東海致比目之魚西海致比翼之鳥物  
不召而自至者十有五臣仰窺

天心保茲

皇上申命用庥蒸蒸然方殷未艾即今十瑞之  
數已合符帝堯矣而治馨誠動無遠弗届  
彼十有五物者殊俗重譯將不紹至踵接  
請來獻見于

闕廷哉臣謹擗管以俟

○擬龍飛紀贊

贊曰臣聞天子者與天地參其斷爲雷霆  
其施爲雨露其照臨爲日月古之聖帝明  
王決幾疑覃惠澤奮景宣光規大園而摹  
大矩未有不兼此者也臣伏覩



皇上<sup>赫</sup>承大統之初昭格

上帝敷錫臣民以執一天下之心志而滌濡其  
耳目者豈不濯濯然振古罕儷哉方羣臣  
奉<sup>進</sup>勸進請

御文華

上弗允遂於

行殿受箋即入

登極夫

皇上以兄終弟及繼統非繼嗣也廷臣拘文襲  
陋靡覺其非而

皇上英資天挺精義入神立折群疑於頃刻雖  
雷霆弗迅於此矣當是時恒暘為沴而  
踐祚之日祥霖應期乃萬象咸蘇懽動朝野  
莫不謂

神龍肇飛而靈滋聿降

聖人潤物之化其速如此即雨露亦讓功焉至  
若改元一

詔正始更新豁蒙蔽以朗融燭幽遐而澄霽二  
儀再造百度維貞蓋炳如蔚如揭日月於  
重光矣夫帝王之全德曰仁曰明曰武

皇上奮雷霆之斷神武也

沛雨露之施鴻仁也

運日月之照臨至明也迨今四紀以來

睿思淵謨颺發奇中羣臣懽服奔走莫贊一詞  
湛恩遠滂協氣橫流而懷生之類罔不泳沫凱  
澤以游於曠熙之域紀綱賁艷英緯繹敷  
彫象形藻萬物而

至治精華殆曷奕乎千古焉夫君道罔不在  
厥初而造端既淑則進盛必隆我

皇上中興之業視

即位之時寢昌寢赫謂不由於

初德之茂哉繼自今

永膺曆數

御天無極將厥武益震厥仁彌浹厥明孔章歷

億萬年如一日矣天下臣民漸被

久道之化咏歌

太平之庥者尚當知所自焉

袁文榮公文集卷之二終

袁文榮公文集卷之三

○贈大中丞東穀孫公入佐中臺序

余束髮學墳典爲諸生時已聞海內有東穀孫先生矣乃今解褐仕逾十載猶未獲望見先生之風采然先生之直節高操學術勛蹟燿燿然輝映縉紳以故名公卿學士爲余稱說之甚詳而昭代偉人若先生者信屹乎軒挺物表莫埒也余嘗聞之古之堅疑剛正誠直不貳心之臣其內而列近署侍皇居則忠信行道以奉主上乃

於是有彌綸袞闕糾逖羣慝匡維元顛之  
功其外而展采四方宣力邊鄙則扶義俶  
儻不令已失時立勛名於天下乃奕奕然  
子蒔蒼黎屏翰邦國綏戢宇疆爲一時社  
稷之隸以今觀東穀先生所表樹非所謂  
若人者邪先生以辛巳進士宰名邑有殊  
政擢寘諫垣忼慨識大體奮不顧身持公  
是非廷折時相當是時先生直聲動天下  
乃屢踣屢振徘徊岳牧諸所歷咸刊厯垂  
休廩廩乎比美曩賢歲丁未

聖天子念先生忠直可大用乃自臬伯陟中丞  
畀以畿輔重任先生受命專閫畢智安攘  
竟虜人讐避幽薊不敢窺焉夫先生爲諫  
官忤貴大臣不少怵爲中丞杜驕虜不內  
侵此不可以觀剛果沉毅之効邪己酉冬  
十月中臺佐理闕人銓曹疏名以請先生  
名在次

天子憫先生服勤外僚積有勞勩且操握風紀  
宜遴宿望特簡擢爲左副都御史入佐中  
臺云先生膺命將內趨都督羅君忠甫以

總戎佐先生於薊乃介其舅氏王符卿乞  
余言爲先生贈余惟先生體名世之具宣  
禎國之猷功播朝野聲滿寰瀛卽童白知  
書賢誦義矣又奚俟余言而後彰邪矧事  
莫危於敢言幾莫難於制敵而先生蹈危  
克難毅然瓌琦表著俯視羣輩乃茲入臺  
中執憲轂下將朝宁貞肅百僚循法皦皦  
然於穆清之化有不助矣儻所謂徵其迪  
履適觀駿功者非邪往先生叅蜀藩時涇  
野呂先生序贈其行謂先生所造當與漢  
汲長孺齊名夫長孺內閑君欲外寢逆謀  
真古稱社稷臣者迹東轂先生之植立不  
可與長孺比氣而量力哉然長孺之在漢  
沮忌於弘湯諸人之口卒不獲躋顯願以  
行其志而先生方受隆眷異知旦夕歷卿  
佐宅端揆蒸蒸然攄茂敷奇用弼成今日  
熙皞之治矣其視長孺之所遇又豈可以  
同日語邪

○送會溪扈君陞南京太僕少卿序

夫輔拂股肱之臣忠信行道以奉主上者

宰相也扶義俶黨立功名於天下者諫官也昔人稱諫官之責與宰相類重可不謂恢廓深遠達觀其要者耶

今制六科都左右給事中卽古諫諍之官其職自封駁章奏之餘法得彌縫

袞闕糾逖官邪條列古今便宜以翊揚元化覬澤區寓以故

國家二百年於茲

神聖繼明英賢熙載引翼穆清於無紀厥所裨益乃諫官之力滋多矣夫策奇宣勩旣諸

省署莫可與鈞故遷秩叙階詮部徃徃以不恒之資詔爵而登用焉內之則抗爵卿寺爲大僚外之則叅方岳嶷然位中大夫之尊傳云美言可以勳尊行可以加人儻非此之謂乎會溪扈君以壬辰進士由中舍擢寘瓌垣通陟兵科都給事中君忠實沉毅洞燭機宜諸所忼慨論建成足以匡翊

睿謨綏戢疆寓曄曄然揚光紫微不惟空文以罔觀聽也故君聲稱著縉紳籍甚歲丁未



原件短缺

5~6页

君以資望當晉秩卿佐乃陞君為南京太僕少卿人曰夫給諫階七品爾茲累級而進列為九卿金章朱紱駸駸焉鈞衡之漸會溪君榮矣然南都去京師千里外君顧解諫職往蒞之豈若雍容侍從朝夕清光以抒茂殫忠於君側乎余獨曰不然夫古之良臣不擇官而仕是故其道不擇地而行出入均勞內外効用乃自古記之矣昔仲山甫典司政本職補袞德然猶勤城齊之行汲長孺拾遺禁闥漢庭社稷之隸也

仁壽之澤以愉快其天年方裔裔然撫今子之名世而祿位榮寵永綏未艾若東甬君儻所謂顯揚之至非耶余嘗聞之孝子以道而昭顯其親必能履明聚順以報其君人惟瑰琦俶儻務自樹以立名則德行政業鮮不輝耀於今古茲君為刑官良於職乃抗迹崇峻位大夫參佐方岳之任將必忠信明確使民不欺因心制義厝之於法使民得理蓋庶幾廩廩古所稱神明者乎夫宣猷於近署鴻烈於監司則廓孝效



忠蜚英騰茂駸駸乎庭堅君陳之遺矣君之所嚮往不可概見其弘遠耶傳云才智斟酌可與興事而為大夫君練於法而有深沉之思殆器識之可大受者故余本其壽父而抒諷采之指云

○送永嘉王九岳之任曲靖節推序

余浙之西南境為溫處二名郡厥地形相錯如繡然處多崇山巖從岡巖類推峯薄霄漢而溫則俯瞰滄海滟泔澁瀆之氣吞吐陵谷夫山海協靈含醇瀋粹故代毓文

人墨卿嫺詞賦以輝映後先可不謂奇勝地克生瓌偉人士哉然其覃精藝苑揚抒妙詮以文顯融於制科者咸燿燿然鉤金石績絲綸無庸寘序列矣而間有握珠抱玉振藻士林乃天網所不及該者余於處之松陽獲龍陽徐子溫之永嘉獲九岳王子焉夫徐子願志典墳發為古文辭豐潤鬱茂足稱作者而王子則徐子為余道其俊逸翩翩有阮元瑜之風格云然二子皆以選貢舉徐今官武學博士子乃任節推

於曲靖徐子以告余曰九岳子下筆摘藻  
龍鳳之文奮矣而雍容侍從寔其人也顧  
使之遠宦於滇曲靖又滇之邊徼郡土人  
卽行墨不能數又安用文士爲哉余曰子  
以曲靖爲遐謂九岳子薄其郡不足適宦  
游耶然余獨謂於九岳有不助焉夫其詔  
猷播政綏逖民夷固可逆睹紀而博觀殊  
眊乃藝文將日益奇麗以工矣蓋人情固  
恒域之觀者執拘攣之態而游詭異之勝  
者發昭曠之思故長卿之文宏贍今古亦

或恢廓於牂牁太白之詩鞭策風霆不無  
激懷於夜郎佺期之藻思滋新於嶺表東  
坡之妙絕崛振於儋耳何者中原嶽瀆其  
翕純曜靈非不閔且駿也然登覽者相隨  
屬則取足無窮乃所見率人人埒矣惟夫  
方外山川融結迥異而豪俊之士寄蹟於  
其間則瀨氣珍景獨窺其深聲之而爲詩  
筆之而爲文皆足以探玄化發秘藏而奇  
詞逸調必非恒學所能道者故窮則工游  
則富超勿則入神其詩之謂乎余聞曲靖

多佳山水郡產寶玉神物王子之行雖與相如諸君子不等同而其歷覽寥邈暢延絃非常之遊則曠世一揆也感物造端辭義雄雋成一家之言以揄揚風雅彰示來世不有崇羨於王子哉

○贈郡守槐溪孫公陞任湖廣憲副序

余讀循吏傳睹所稱法令以導民刑罰以禁奸文武不備良民懼未嘗不欽然歎曰子長論治淵哉其言之也及今觀余明謠俗與郡守槐溪公之政理乃益深慨慕焉

夫明枕海負山而郡民大較仰海利以生然藪利而瀕害其勢趨使然也弘德已上靡暇論著矣頃年島夷貴中國財物輒操貨入海濱賈易奸民沒於倍直闌出不避法禁走風濤如鶩已乃轉相眩合導謀焚鹵海壩之民蕩無寧宇比歲兵連不解洵洵矣槐溪公曰爲治善者因之其次利導之其次教誨之其次整齊之最下者與之爭顧吾民狃利其禍而夷醜日尋干戈莫之創內構外訐亂滋殷矣教誨而整齊之

其策可少紆乎於是勅法明憲令民無以  
貨卽夷亟檄當道大僚勦俘其渠而攜其  
黨乃茲潢池弛驚海陬其蘇駸駸乎有案  
堵之望公之勤民此尤踔然閎矣儻所謂  
導以法令禁以刑罰備文武而蔣良民者  
非耶歲癸丑春三月觀典報成章瘳丕赫  
天子嘉公守明靖寇有奇績首擢公爲湖湘觀  
察副使以風有位明人無貴賤童白喁喁  
然相與奔走懽罔若失怙恃造余而言曰  
吾儕顓蒙逖古靡所知矣然聞諸漢制郡

國刺史守相治行卓異者不遽遷其官往  
往增秩賜金或賜爵至關內侯此非靳官  
以淹英傑也保釐而澍濡之民方浸仁人  
之禔福而一旦奪易之他非所謂迂民而  
闕治流耶屬者鯨波沸揚甬東震蕩民皆  
佛惛驚悸孑然不有其生寔賴公綏懷捍  
城葆就民命乃今遷之以去楚人將胥慶  
矣吾越人不憫憫胥感乎余避席而解之  
曰楚越皆天子之民庇楚而捐越非  
國家意也第帝王之馭臣均節勞佚以平其

情積繁資望以需其用槐溪公勤余明五  
載勞矣乃茲移副湖臬握憲外臺勢尊而  
務簡斯固養安以裕其才也且公淵稽而  
駿發沉毅而灼幾

國家方倚毗簡注以贊治平翊鴻業也驟遷  
而速化將羣望未孚而公亦不無自珍之  
懷臬副秩膺方岳位聯鼎鈞晉陟卿孤  
可計日指數矣由是而出秉節鉞開府閩  
浙以督海防入宅端揆調劑元化以靜寰  
宇公之德施汪濊遺吾越人與楚人埒沐  
諸君胡然憇於公之去余明耶時余邑令  
曹子謂余言知公之深足以孚衆志矣請  
書之以贈公

○奉賀及齋魏公陞山東憲副序

余慨今之吏治乃齟齬然就些窳日滋矣  
然究極其所繇則以學術不明而義理經  
濟之學岐而爲二以故譌佛焚勳各以其  
所見相詫調而治道遂爲天下裂夫宰制  
萬物役使羣衆而其旣至彌綸位育訢合  
絃宇治道之闡宣元化偉矣乃其熙疑經

緯之機則皆吾心之所粹瀆而無待於外  
取列撰英詰踵武媿聲其所以業隆功羨  
舒盛發榮而常爲稱首者越治心之餘無  
要眇也余每披藝觀之儒者談說孔氏論  
著心學無慮數百家杼指通意非不犁然  
可徵睹也然或淪虛而罔際其實飾繁而  
莫窮其源則達之治道忽忽乎其無當矣  
余獨悅慕乎近世陽明先生之學而其所  
稱致良知之說尤炯然闡不傳之祕使今  
之儒者能澄心翫契妙解靜觀真有以見  
其心跡之渾淪知行之一貫則義理經濟  
皆吾本體而言學者不驚於玄言治者不  
病於駁聖人明德親民之功用將不潢然  
愾天下耶夫陽明之學閎奧矣而拘學之  
士固同耳食乃若揮舄淵閱綜厥著施而  
良知妙用章章炳烺於治化間者余於南  
野歐陽公及齊魏公咸懽然忻服焉南野  
公今爲少宗伯方以其學熙明鴻業翊贊  
帝謨而及齊公則行其所學於吾明保釐  
海邦澍沃蒸庶守明僅四載而教洽澤流

將湛沔於來禊未艾若二公所表見儻所  
謂義理經濟合一而不測非耶及齋公茲  
以學成治最擢貳東臬飭兵江淮而吾明  
童白喁喁然如失慈母公雖榮都憲節擁  
旄在行猶惓惓於明之赤子而不忍遽舍  
以去夫上下胥結而不攜人心永懷而不  
釋此不可以觀良知之無間而徵公致知  
之功用哉及齋行矣將以孳植吾明者救  
寧江淮之民厥勛業固踔乎可稽覩也余  
又聞之道化無垠則號榮溢發公之晉頌  
陟顯宅乃鼎臣沛所學於天下而吾明之  
民裊福無旣茲猶非公之所能耶余邑大  
夫龔君乞余言以賀公余不佞乃原公之  
學而書之以塞君請云

○贈邑父母少山曹侯入覲序

皇帝御曆之三十二年為癸丑復當大覲之期  
維時寓內方岳各帥其屬集

闕下敷言試功陳序職守天官卿詔於

上而黜陟其幽明焉先期壬子冬十月余慈侯  
少山曹公束圖書秣馬以行乃徧辭於邑

縉紳余方病卧江滸餞贖交闕侯罔余鄙  
遺過而言曰吾治先生邑甫閱歲役役焉  
給將迎者日不暇也然坐縣庭視篆而親  
民務靡獲以月計吾茲行將持奚功以試  
又奚言之足敷耶余敞罔而避席曰嘻侯  
不滿假若此哉以余耳目所聆睹侯之嘉  
績閱博矣茲歲之夏海寇構連倭奴操輕  
舠利刃出沒風濤中入瀕海民家鈔子女  
金帛殺其老壯而焚其廬虔劉之慘震驚  
邑治侯乃選募梟俊團結鄉伍明間謀扼

關隘恟恟然昕夕靡寧籌所防捍之策已  
而民怙孔邇群心不攜潢池徹驚邑里案  
堵如昔矣此侯遏亂保民之功其弗可言  
耶茲歲之秋魃肆其虐天不雨者逾浹旬  
矣種秫焦稿穡人警號侯恫瘝民命憂心  
如燔乃貶服出舍徧走明神去盖行赤日  
中詣龍湫請禱禱已歸未及邑郭門油雲  
布合甘澍隨降徒從霑濕懽歌滿郊旣而  
霖雨沛然者數日原隰優渥槁禾敦興闔  
境有秋民訶士咏洋洋乎可被諸莞絃矣



此侯弭災歛福之功其弗可言耶茲歲之大比士之挾藝而應選者皆侯所封樹之材侯嘗以春月校文而上下之拔其尤者數人士之心未盡服也乃今充賓興之賦揚翹而擢雋焯焯蜚聲詞苑者悉侯秀才高等焉茲故稱文獻邑侯至而振嘉藻時國楹士皆爭自濯磨以故龍驤鳳躍視疇曩滋盛矣此又不可以言侯崇文作士之功耶夫功在遏亂是稱社稷之隸功在弭災是稱生民之父母功在作士是稱學者之師帥侯方筮仕海邑所昭登而飭立者已體備鼎臣之能持是而獻之天府將褒然爲循良稱首矣他日陟順都顯此不爲之兆行哉於是侯揖予而別曰吾之功不能符先生之言然聞言服教足以壯遠行矣時邑博揚山方君四可朱君謂余言知侯之深命余序次之以贈

○奉賀嚴郡守后峰楊公膺薦獎序

余於庚戌之冬守史職九載滿遷講官而同年后峰楊公以兵部尚書郎出補嚴州

郡守同日趨

闕下謝明年辛亥公蒞嚴而余以是秋

請告歸遂讀禮家居閱四載矣公猶留蹕嚴未晉陟也余邑人遊嚴還者每稱說公德政而斧繡之使軼往來浙中尤輒獎予公罔間然公竟未之陟也余意竊疑之往公在兵曹職主修攘扞城糾逖王慝郎署極天下之選而公沉厚精練聲華籍甚部尚書下靡不欽然異之顧今典郡理民務視兵機難易較然著矣乃公長於兵至郡反

不任耶余滋益疑之既癸丑冬仲月余謁新安齊雲山舟道子陵瀨抵富春入青溪山谷中覽睹其風俗淳美田野墾闢市無喧競途有謳歌余喟然太息曰后峰公之政澤其濡澍漸沃入人深厚至此乎夫官有殊績宜褒然膺顯陟以章示有位而公顧滯南土未遷豈

當宁憫念睦人之疾瘵特久公以長育之將增秩賜金爵爲通侯不以恒資叙公瞻念超擢卽召列九卿如漢盛時故事乎然余

猶疑當道者奪其鑑未克知公深也歲甲寅大中丞思質王公膺特簡撫雲中代去首薦公治行最已而巡按劔門趙君理巉鳳巖陳君交檄公材賢旌獎之若曰公端亮簡靜清慎冲雅任久而績效宏深政安而民物熙懌是古之循良而鼎鈞之重器也公屬吏淳安簿楊子蕙謂公薦獎協孚被

璽書擢寘卿輔可翹俟矣以余於公有昆弟之誼遠走使乞言為賀余輾然而命筆曰

休茲后峰公是謂以徐顯以駿發而大受乎夫天之生材其篤而厚之也必將鬱滯稽結而後長懋其積而用之也亦必待紆迂遐永博肆而錯陳之以暴見其文章

國朝近事兵曹屬以次遞遷職方郎至職方郎率因緣階地取徑約得超致巨僚而后峰公乃以選部郎出守山郡且以不能徼藉容庇而需遲於郡職者數年此豈有異故哉凡博眎器使之以表樹鴻烈也夫郡國守相之官是稱封疆之牧伯布德宣化

乃自古重之矣藉令公第留內得躡取通  
顯其能宣布德惠俾有聲於浙東西睦婺  
之間卽又能流光於臺旌剡薦如今時乎  
蓋余觀公純明而忠實持重而沉果章程  
憲度靡所貸貫至諸士夫吏民則殷勤懷  
惻遇之如恐不及蓋古所謂長者也

孝皇帝時號稱極治當是時元公鉅老率恂恂  
雅醇縉紳先生以此相式皆有長者之度  
而無涼薄之心乃覩之近時若稍殊異焉  
忠厚意寔衰耗矣后峰公自茲而蜚英陟

顯究其所施用庸不翼贊休明醞育元厚  
舉世道於疇曩之隆耶他日旂常之紀彝  
敦之鐫余殆執筆以俟云

○送韓旋峰令興化序

余慈邑勾章鄞鄭之間厥地鮮閔鉅山水  
然而蜿蜒洄瀆亦奇麗可覽觀焉以故士  
之明經修藝文者後先相隨屬立名當世  
浹於茲猶斌斌郁郁與海內英杰抗偉云  
顧頃年人士多以齊魯詩貴顯至通禮經  
振跡者乃寥廓不數數見邑縉紳輒相與

掉湮闕焉旣而嘉靖丙午旋峯韓子裒然以治禮魁兩浙明年丁未偕石南葉子升南宮成進士乃慈之人士咸喁喁然嚮風興於禮矣未幾詮曹叙次進士界之治基置郡縣將以闡宣玄化歎澤海寓韓子得揚之興化令比行鄉大夫祖餞於都門外韓子揖余而請曰吾懼罔克業茲官君乃獨珍閱不灑然惠德音乎余曰古昔守官導民之士表奇著聲名實純粹舍經術其曷能哉牒記以往靡得而稱已漢諸學士

先生文翁化蜀厥有春秋平當行河取諸禹貢顛君典郡本之文雅彭宣司牧獲諸讎易至君公孔安國龔少卿之屬此皆所謂經生宿學也籍於民社之寄乃廩廩焉發其素業便宜以爲治迄茲猶輝映焉夫經術適治古之人昭顯可徵睹若此如吾子得禮經之精旣已擻茂發榮不詭於古人矣由是而守道遵軌貞教樹儀卽方行域中吏治胥蒸蒸有嘉蹟也矧興化邑理何有焉余嘗考漢儒之言禮者多由高堂

生而魯徐襄以善容至廣陵內史瑕丘蕭  
奮則以禮爲淮陽太守夫廣陵淮陽咸東  
楚地其俗剽悍輕揚其人民沾沾自喜多  
易長民者欲防其滯而救其敝非禮則無  
術矣故襄奮示之以禮乃維風惇俗勛名  
橫炳傳後禩可述稱今興化固廣陵之邑  
而淮之密壤也吾子舉禮而措諸治則讓  
德若大雅釐之於身而施及蒸庶厥治行  
政業將曄乎世儒莫可幾也庸不與漢材  
比氣量力同堂而唯諾哉夫通經而不適  
於治者謂之炙輠而畔經厲民而不繇於  
禮者謂之索瓠以疏紂茲二者與耳食足  
持何異耶於是韓子蹶然拜手曰今而後  
乃知禮之足以宰羣動儒術之有大受也  
請序第所言爲贈

○送沈春莊令新安叙

春莊沈君汝和者余邑槐墩侍御公仲子  
也君承槐墩公家學誦習先王能文章乃  
自博士諸生入國學爲高等輒校藝於有  
司輒不弟君達觀義命不恩不憫竟以選


入謁天曹得贛之宜黃丞夫丞秩卑而貳  
邑世之業茲官者鮮能持高節以自振君  
獨念世家子嘗學問宜亢宗表奇以樹官  
守乃益砥礪修絜蹕蹕然以賢才著聲由  
是丞宜黃五載毋或紕政浣行以取其名  
旣績最於司功遂詔選部而登用之於是  
擢君爲新安令君被命過余而請曰始吾  
仕爲丞猶慄然懼弗能其官惟昕夕兢惕  
以求免罪戾乃今尹茲中土邑厥職任視  
丞將什倍矣吾子何所幸教俾罔覆公餗

以臧後耶余謂君曰純鈞之鋒不以物之  
巨細而異其利驕驕之足不以途之險易  
而殊其良君以文學飾政事在宜黃爲賢  
丞矣洵所蘊以駿發於新邑寧不爲賢令  
尹哉雖然今之仕進無論外內崇卑皆  
棘殆然而上之人責望以稽其成下之人  
怙賴以濡其澤而左右胥史又復懷諛衆  
慝以乘其弊者惟邑令爲甚故夫豪傑之  
任其官能錯綜參伍不失機宜而上下左  
右恬熙綏帖而無違心則游刃有餘隨適

而奏功矣余嘗聞之政有寬猛而壤有粟  
息斯二者貴因俗而順其施故以寬政而  
行之於息壤則民日淪於此窳以猛政而  
行之於粟壤則民日怵於慘礪何者所施  
忤其習也新安雖褊小邑然介於高洛之  
間刑清訟省民性安舒其地固息壤也顧  
邑隸中州非邈焉僻處者可埒國賦藩祿  
腴削無虛歲是以瘠薄寡聚民皆迫於營  
養息而未始不粟也乃今往蒞茲邑毋佚  
度以奸上毋俛德以缺下毋墮法以翫左

右察粟息之機通寬猛之變優裕生殖擾  
馴其民則譽聞將殷殷起政成人和嘉績  
丕著他日監司揚之詮曹器之其所以宅  
君才者豈郎大夫所可限耶於是君拜手  
曰美哉今而後乃知政之宜民矣願書之  
以遺永規





Handwritten text in a vertical column on the right page, possibly a date or page number.

Handwritten text in a vertical column on the far right edge of the page.

心而休遐不恬夷而懼險惟職  
殫吾心力之所能日豐豐  
日用是樹勛施聲表見奇節卽  
力往往奮庸可稱與矧君以文

○送余東川同知蒲州叙

夫今之論治者輒稱修經術藝文之士以

其學顯名當世潤色鴻業云然雋敏通朗  
之才奮庸有位踔然振采樹表見閔烈者  
徃徃能以法比學起家乃究觀其爲人則  
皆砥行絜修立廉陳義多爲仁人學士所  
獎予焉余同邑東川余君字仲容者以世  
家賢胄俶儻負高節幼業儒程有司弗效  
乃棄去以法家流從事都帥闡爲掾史君  
雅持清操耻爲世俗乾沒吏都帥深器重  
之遇君禮獨殊羣輩莫敢望焉旣積資勞  
當論官晉校於銓部時銓卿皆名碩鉅公

不輕甄下吏而君以文無害夙著廉勤爲  
詮卿所奇擢真選人高等授七品階除通  
州衛叅軍夫通州蕞然居輦轂下衛士卒  
實隸京籍股求紛役日滋就彫敝不可支  
君能調劑剴裁形格勢禁審強弱之宜而  
節宣之以故軍政用肅而茲衛怙君以有  
植矣然職務振飭才名益殷殷起當道者  
廉其能以大事委任者相旁午頃年以來  
國家歲興兵誅北虜而督運儲粟飛輓以奉  
戰士君咸効有績勤焉夫君爲叅軍視諸

參軍最賢而詮曹之待君顧與諸參軍等  
乃亦以九載考始陞君爲蒲州同知鄉人  
士以君勞多而遷滯相楚焉爲君不屬厭  
而君獨充然喜復慄然懼弗勝者將之蒲  
就余而商治余曰夫察往軌者可以昭來  
蹟睹前物者可以稽後庸干將青冥之鏗  
水擊鴻鴈陸斷犀兕異施而同利也騏驥  
之足鳴鑿五衢趨風九折異驅而同良也  
君能展奇於參軍有不著聲於州佐乎古  
稱文經武緯道出一原是以治兵之與理

民義不容岐析爲二致在易之師曰地中  
有水師君子以容民蓄衆夫師者聖人所  
以夷險阻救危殆其事在奮威揚武而毒  
天下者然而樞機所繫故在於民之容而  
衆之蓄焉則夫君之所綜畫於參軍者固  
足以佐州大夫而出治矣矧蒲爲有虞氏  
之故都其民有勤儉之思有忠信之文有  
惜怛之實有愛利之遺風淳而俗樸舉易  
治者蒲於晉墟爲稱首才刺史綱維其肯  
繁而君率僚友弼襄之灑濯其心明徵其

度則君治蒲之令美又將輝映於無間由是而蒸蒸嚮用弘沛厥施以登進於未艾予於君不有崇覲哉於是鄉人士謂予言足以廣君而禪之政矣乃書之爲送行叙

○送桂世德之任聊城簿序

予邑桂君世德爲名宦儒家賢子姓少攻舉子藝文不果售乃棄去更以從事仕仕而宰驛者二主倉籍者一君通敏持賢操善自樹立務砥行絜修耻爲世俗乾沒吏故所至皆以廉勤著聲卽卑資瑣職多爲

縉紳貴顯官所甄錄焉嘉靖乙巳君以倉曹秩滿自信州上計於銓部銓部羣計吏而程其才君明習法律爰書論報銓大夫深器之乃以文無害序列計吏第一人特受聊城簿俾董漕渠之役以當其能云君被命以茲邑地衝而務艱懍懍然懼弗能其官就予稽水政焉予告之曰君何難於聊城哉以君之才濟之以勤國計將有賴矣夫察徃軌可以知來迹試成效足以徵後功君之治行兆於候人彰於廩人乃今

殷發於漕事將不謂游刃有餘地耶夫驛之務主達賓客之行而倉曹之守在散其積滯以登降其數若河渠之政則穿鑿通引轉運漑浸利其達而患其積滯也君昔再釐繁驛道無留賓而勾檢錢穀盡滌逋欺則達而罔滯已底績可覽觀矣由是而達餽道之壅闕使不梗滯艘舸所經艤沛若决隄寧不於國儲邊餉弘裨益哉方今聖天子受命於穆清流德海寓川疏澤灑諸夏艾安而翕河之治與成周比隆固不必舉

芟沈玉靡費以事疆塞如漢宣房之役矣然而氣忒其軌河伯喪守則離流弛道沸鬱靡常河菑之所被厥貽害於軍國爲甚博故以人謀幹天事捍禦其患菑俾無滋蔓自禹功以來未之或廢也會通一河寔徑東郡南受濟兗之水北入衛河而黃河自東北來注之故霖而皓旰暘恒而泮涸潰防則汎溢淤積則齟齬以河渠爲職任者宜昕夕畢力以求令圖矣昔齊人水工徐伯表發卒穿渠漕以便利其後漕益多

而渠下之民得以溉田其故智可考而循也君之邑卽齊西境而引汶水於泰山以著功尤彰彰未就湮滅旁搜博訪寧無若人者出於其地乎予觀漢史有浚渠濟漕致粟多而灌田沃者往往增秩賜金稍遷郡邑長吏君能奮熙於聊城有不被尊顯以風有位哉君當知所勉矣

○贈邑博省齋符君陞伊陽學諭叙

省齋符君者金陵人也金陵沿六朝之餘士習類尚文辭工詩歌擷英撝華曄曄然

以繁縟藻績相高乃省齋君獨怫然曰儒者莫不有口顧所行卽無徵也遂砥志礪行詣極閎奧允迪視履明之於爲居常忱恂幅實不施章采至究覩其所植則篤學致道粲然成天下之文儻所謂文莫猶人躬行君子者非若人之疇耶君起家京兆弟子員治古文尚書靜觀神解靡驚空說然每有所著論皆抉微推隱鈎闡淵閔卽精於尚書以宿學名者自以爲莫君及也余觀孔氏之教妙入無言雖性與天道亦

罕所稱說及默契心傳得統聖真則惟顏  
之愚曾之魯而穎悟通敏斌斌然以言語  
文學成能者咸弗之與漢興諸儒去孔氏  
之學未遠而申公伏生之徒明經博古六  
籍賴以顯微然皆訥於文詞口無眇辯而  
達觀天人文章爾雅后世談經之士俱詘  
焉省齋君修學迪教篤實輝光將不謂攷  
鏡孔氏而景行漢儒者哉余慈以文獻著  
聲材賢輩出乃操觚振藻焯然立名當世  
者不爲鮮然雕脂耳食炙輶畔經文勝而

行業衰知道者不勝其悼鬱也省齋君飭  
躬貞教崇化厲賢士之漸漬被服者已八  
載矣乃今象德敏行鄉風而不變者日殷  
殷起而君顧陟伊陽學諭舍諸士以去諸  
士戀焉有惘惘色若曰胥樂哉伊陽士也  
吾慈失良師儒矣余解之曰百年之計樹  
人千年之計樹德省齋君教吾慈八載厥  
所樹弘茂矣卽諸君不忘其所樹而務滋  
焉則君之風行澤流亦或千百年可未艾  
也又焉計伊陽之得而吾慈之失耶於是



諸君相顧蹶然而釋請余書之以爲贈  
送友人何羅泉之任南昌郡博序

余年甫十歲卽從先大夫游學於杭之潛  
陽焉潛引天目之秀谿山映帶亦閑靚邑  
也邑中人士多穎敏雋發與之共學適道  
皆踔然非庸瑣埒者然頃年鮮膺薦書解  
韋褐而仕而羅泉何君則與予治詩同師  
受砥劇逾十載云君資性軒越厭薄流輩  
諸所論議涉獵往往超悟玄覽詆一切蕪  
陋之學已操筆作文詞沉思凝構務奇警

可喜生平潔行邁修耻熾嗇媿阿之態余  
嘗竊念之美材出於羣植其用必文爲梁  
棟嘉稷馨於同畝其芳必升諸神羞若吾  
友羅泉君者他日不借余揚光紫微黃皇  
居之寶耶旣而余以丁酉戊戌第入翰林  
歷今官君乃輒舉於有司輒不第又十餘  
年庚戌竟以貢第余爲君歎嗟者久之是  
歲夏仲月相遇於京邸談故舊驩甚留與  
同居數月而君以貢舉高等冬季月卽授  
爲南昌府學訓導今年春元夕君捧檄去

余行矣擘余袂喟然曰尊官厚祿世之所  
高也賢才處之而吾以謫劣罔敢覬然嘗  
聞昔之抱負墳策挾儒術上京師者類得  
補文學掌故侍近署而與未議茲乃棄居  
外郡殿然從儒官之後吾將奚以杼指而  
通意乎余曰吁君胡見之罔晰也夫今之  
黼繡其衣朱丹其轂躋華津而饜臚祿非  
世所謂高賢才乎然諦察其所施用則澌  
然莫徵睹矣盜賊發不能禁夷貊不服不  
能攝姦邪起不能塞官耗亂不能治四時

不和不能調百穀不熟不能適陳功綜實  
靡所稱舉是之謂執空文以調上飭虛智  
以眩下其將何所匡裨以避奪糴之咎耶  
乃若君之所處則雍容甚矣傳有之百年  
之計樹人千年之計樹德師儒者濬淵闡  
祕崇化厲賢國之所賴以藝材而植德古  
今名公碩輔翊樞贊元庶官衆正服休展  
采功顯當世而名流春秋不泯者皆黌校  
所萃而師儒之甄淑也矧南昌爲文物隩  
區江山秀發才賢彙征乃自昔記之矣君

優游職業發其所素稽以爲教則異能奇  
士嚮風赴節後先蜚英而陟崇峻者咸君  
之所樹也儻與古申轅毛董之流並烟齊  
輝其所獲不愈於高賢者之裁乎於是君  
拜首曰道高益安勢高益危吾旦暮受升  
斗以願親亦足自樂矣尚奚復他願耶然  
子之言則廣矣請序之以贈吾行

